



EKSYON 6
AGPALAMBO SA IMONG
ANIMALAY

Matun-an Nimo Niining Leksyona

Ang Pagsinabtanay

Mga Butang nga Salapianon

Relasyon ngadto sa Ginikanan

Ang Kristohanon ug dili Kristohanon nga Panimalay

Ang Kristohanong panimalay

Ang dili Kristohanong panimalay

ANG PAGSINABTANAY

Ang pagpalambo sa usa ka malipayong panimalay nagakinahanglan ug mga pagsinabtanay sa bana ug sa asawa. Batonan nila ang pag-uyonay sa tanang paagi sa pagkinabuhi ug magbaton sa panghunahuna kon unsa ang labing maayo alang sa ilang panimalay. Usa ka maayong bersiculo nga ibutang sa hunahuna sa dihang tukuron nila ang panimalay mao kini:

Filipos 2:3. Ayaw na kamo pagbuhat ug bisan unsa sa tuyo sa pagbahin bahin o sa kawang pagpagarbo sa kaugalingon, hinonoa uban sa pagpaubos isipa ang uban ingon nga labi pang maayo kay sa inyong kaugalingon.

Nag-ingon ang Biblia, “Kinsa kadtong nakakaplag ug usa ka asawa nakakaplag ug usa ka maayong butang ug nakabaton ug kalooy ni Jehova” (Proverbio 18:22) . Apan kon adunay duha ka tawo nga gikan sa nagkalain-laing paagi sa pagkinabuhi sa kalit lamang magkahiusa, sa kanunay daghan gayung problema nga moabut. Ang uban makaingon tingali, “Dili maayo nga magkaminyoay kining duha.”

Ang unang bahin alang sa pagsinabtanay ning duha mao ang paghunahuna nga sila duha na ug dili usa ra. Sa wala pa ang kaminyoon nagahunahuna ang tawo sa iyang kaugalingon lamang. Human sa kaminyoon dili na “Unsa may maayo alang kanako” kondili “Unsa may maayo alang kanamo?” Hangtud nga silang duha makasabut na nga sila magkinabuhi alang sa usag usa, aduna gayuy mga panagkabingkil ug uban pang mga kagubot. Dinhi makita nato ang kaayohan sa usa ka Kristohanon tungod kay makaampo man sila sa Dios sa pagpangayo ug panabang.

Dili mahimo sa pipila lamang ka mga minutos ang pagtukod sa usa ka malamposong kaminyoon. Usa kini ka buluhaton alang sa tibook nga kinabuhi. Kon ikaw makasabut nga duna kay mga katungdanan ug mga kaakohan ngadto sa imong kapikas, makaandam ikaw aron mahimong masinabuton ngadto kaniya. Pangayoa sa Dios ang Iyang paggiya kanimo adlaw-adlaw samtang nagapamuhat ikaw sa inadlawng pagkinabuhi.

Kon ang bana buot mobuhat sa usa ka butang sa usa ka paagi ug ang asawa buot sa laing paagi, kinahanglan usa kanila mosugot nga dili na lang matuman ang iyang gusto aron walay kagubot. Kinahanglan silang duha magtinguha sa pagsinabtanay ug dili magtuman sa ilang kaugalingong mga kagustohan. Kinahanglan walay usa

kanila nga maghunahuna nga siya lang kanunay ang matuman.

Malisud tingali nimo isakripisyo ang imong mga plano ug kagustohan, apan ang gugma makatabang kanimo sa paghimo niini. Usa kini ka importanteng bahin sa kaminyoon nga gikinahanglan alang sa usa ka malipayong panimalay.

Buhata Kini

1. Unsang bersiculoha nga maayo ibutang sa hunahuna sa mga bana ug mga asawa?

.....

2. Unsay kalainan sa panghunahuna sa usa ka tawo nga wala pa maminyo ug siya nga minyo na?

.....

.....

.....

3. Si kinsa man kanila ang magtinguha sa pagpaubos sa ilang kagustohan kon dunay kasumpakian sa bana ug asawa?

.....

MGA BUTANG NGA SALAPIANON

Usa sa mga butang nga r^o pahimo ug bingkil sa panimalay mao ang salapi. Maayo alang sa bana ug asawa nga magsultihanay mahitungod sa salapianong butang. Kinahanglan nga ang asawa magdaginot kutob sa iyang mahimo labi na kon gamay ra ug pangita ang iyang bana. Dili tungod kay sila magtiayon na nga bisan unsa na lang ang iyang pangayoon ug paliton. Kinahanglang motabang siya pinaagi sa pagtigum. Ang asawa dili magbagolbol kon ang iyang bana dili makasugakod sa pagpalit ug mga bag-ong biste nga iyang higustohan. Kon sila magpuyo nga ubos pa kay sa ilang mga higala o sili-ngan, dili kini niya ikaguol. Himoon hinoon niya kini nga hagit sa paghimo sa iyang panimalay nga madanihon ug malipayon taman sa iyang mahimo.

Sa laing bahin, kinahanglan ang bana dili maghunahuna nga ang iyang asawa magadumala sa panimalay nga walay salapi nga magamit, o maoy magapangita alang sa kinahanglanon sa panimalay. Ang babaye makatabang sa mga galastohon, apan ang bana, isip maoy pangulo, mao gayud ang magapangita alang sa mga kinahanglanon sa panimalay.

I Timoteo 5:8. Kon adunay tawo nga wala magatagana alang sa mga iya, ilabina alang sa mga sakop sa iyang kaugalingong banay, kini siya nagalimod sa iyang pagtoo ug labi pa siyang dautan kay sa dili magtotoo.

Buhata Kini

4. Nganli ang tulo ka paagi kon unsaon sa asawa pagtabang sa bana aron dili sila magkabingkil mahitungod sa salapi.

.....

.....

.....

5. Unsay gisulti sa Biblia mahitungod sa tawo nga wala magtagana alang sa iyang kaugalingong panimalay?

.....

.....

RELASYON NGADTO SA GINIKANAN

Maoy kasagarang suliran nga mahitabo mao ang relasyon sa anak ngadto sa ginikanan. Ang kaminyoon wala magkahulugan sa dili na pagtahud sa ginikanan. Wala kini magpasabut nga talikdan na sa bana ug asawa ang ilang suod nga pakigdugtong sa ilang mga ginikanan. Kinahanglan nga ang ginikanan makasabut nga ang ilang mga anak nga naminyo aduna nay bag-ong panimalay ug kaugalingong mga kaakohan.

Marcos 10:7. Tungod niining maong hinungdan ang lalaki magabiya sa iyang amahan ug inahan ug ug makigtipon sa iyang asawa.



Usahay makalimot ang ginikanan nga ang ilang mga anak minyo ug hamtong na ug aduna nay kagawasan sa pagdumala sa ilang kaugalingong panimalay. Makahatag ang ginikanan ug mga mahinungdanong tambag kon ang mga bag-ong magtiayon magapangayo niini, apan kina-

hanglan nga dili sila magadumala sa panimalay sa ilang mga anak o tudloan sila unsaon sa pagdumala niini. Bisan sa pagdawat ug tambag, ang bana ug asawa magahuna-huna nga ang ilang kalabutan sa matag-usa magauna kay sa ilang katungdanan ngadto sa ginikanan.

Ang asawa kinahanglang dili mopauli sa iyang ginikanan matag panahon nga sila magkabingkil sa iyang bana. Mahimo nga mobisita siya matag karon ug unya, apan iyang hinumduman nga ang iyang panimalay dili na uban sa iyang mga ginikanan, kondili uban na sa iyang bana. Kinahanglang dili siya magpahalayo kaniya sulod sa dugay nga panahon. Ikaw iyang gikinahanglan ug imo usab siyang gikinahanglan. Ang dugay nga panagkalagyo magapaluya sa kaminyoon ug magahatag ug mga kahigayonan sa pagtintal sa bana o asawa.

Buhata Kini

6. Unsay kanunay malimtan sa mga ginikanan kon ang ilang mga anak mangaminyo na?

.....

.....

.....

.....

ANG KRISTOHAN UG DILI KRISTOHANON NGA PANIMALAY

Ang Kristohanong panimalay



Ang kristohanong panimalay usa ka malipayon nga dapit tungod sa presensia sa Dios ug sa Iyang tabang. Tungod kay kini pinasikad sa Pulong sa Dios ug nagatudlo sa maayong panginabuhi, kini adunay kalinaw ug ang tanan niyang sakop nagahiusa sa mga buluhaton. Labaw sa tanan, si Kristo maoy Pangulo sa Panimalay ug nagapuno niini sa Iyang gugma. Kon wala ang iyang pagmando, kini dili matawag nga usa ka kristohanong panimalay bisan pa kon sila sakop sa usa ka iglesya nga matawag nga kristohanon.

Ang matuod nga kristohanong panimalay dili mahitabo sa kalit lamang. Dili kini mahimo tungod kay ang mga tawong nagpuyo niini mga kristohanon. Ugmaron gayud kini nila. Samtang magatuman sila sa Pulong sa Dios matag adlaw sa ilang mga suliran sa kinabuhi, naugmad nila ang usa ka halalum ug makatagbawng gugma nga nagagikan sa Dios — ang gugma nga makahimo sa ilang panimalay nga daw “langit dinhi sa yuta.”

1 Corinto 13:4-7. Ang gugma mapailubon ug mapuangoron. Ang gugma dili tigpaburot, dili bastos, dili maakop-akopon, dili masuk-anon o mali-gotgoton; ang gugma wala magakalipay sa mga

buhat nga dili matarung, hinonoa nagakalipay kini sa mga butang nga maminatud-on. Ang gugma mopailub sa tanang butang, motoo sa tanang mga butang, molaum sa tanang mga butang, moantus sa tanang mga butang.

Usa ka kinaugalingong hubad sa mao gihapong mga bersiculoha nag-ingon:

Ang gugma mapailubon ug maaghop, dili mangabugho o masina, dili hambugiro, dili mapahitas-on, dili dalo o bastos. Ang gugma dili madalidalion ug dili dali masuko. Dili kini magdumot ug dili dayon makakita ug sala. Dili kini malipay sa dili matarung ug malipay kini kon modaug ang kamatuoran. Kon ikaw nahigugma, magmatinumanon ikaw kaniya bisan unsa kadaku sa bili. Mopatuo ikaw kaniya ug maghunahuna sa labing maayo alang kaniya ug sa kanunay motindog sa pagpanalipod kaniya.

Buhata Kini

7. Unsa ang pasikaranan sa usa ka kristohanong panimalay?

.....

8. Unsa ang labing importanteng kinaiya sa usa ka Kristohanong panimalay?

.....

.....

Ang dili Kristohanong panimalay

Dili gayud hingpit ang kalipay sa usa ka dili kristohanong panimalay tungod kay nakulangan man kini sa panalangin sa presencia sa Dios ug magaanus man kini sa resulta sa mga sala.

Makita nato sa ubang mga panimalay ang mga lalake ug mga babaye naga-usik sa ilang salapi sa sugalan, mga tambal, tabako ug sa makahubog nga ilimon. Ang uban nahimong ulipon sa alak nga magasto nila ang tanan nilang kinitaan sa usa lamang ka gabii. Wala nay mahibilin aron ipakaon sa ilang asawa ug sa mga anak.

Daghan sa mga panimalay nga adunay panag-away gumikan sa pangabugho, kapungot ug imoralidad. Ang bana nangitag babaye o laing asawa ug mao man usab ang buhat sa asawa.

Mga dautan nga mga basahon ug mga law-ay nga mga pinulongan kasagarang makita sa dili kristohanong panimalay. Ang mga bata namatuto sa kadautan sa pagtan-aw sa telebisyon o sa ilang mga palibut.

Ang mga tuotuo ug mga pangdiwata nakadugang usab sa ilang kalisud, kaguol, kahadlok ug kagubot.

Salamat sa Dios nga sila mausab ngadto sa pagkristohanong panimalay kon ang ilang ginikanan mobiya sa ilang daan nga paagi ug mosunod na sa Ginoong Jesukristo.

Buhata Kini

9. Unsa may nagkahitabo sa kasagarang mga dili kristohanong panimalay?

.....
.....
.....

10. Unsaon man sa mga ginikanan pag-usab sa ilang kahimtang?

.....
.....

11. Balika pagbasa ang tibuok leksyon ug sukda ang imong kaugalingon ug ang imong panimalay. Pag-ampo sa Ginoo nga ikaw ug ang imong pamilya tabangan Niya sa mga punto nga imong gikinahanglan. Kon ikaw wala pa maminyo, karon mao ang panahon sa paghulma sa imong kinaiya nga makatabang kanimo sa pagbaton ug malipayong panimalay ugma damlag.

12. Susiha ang imong mga tubag sa mosunod nga pahina.

13. Sulati ang imong rekord sa estudyante nga makita sa luyo sa basahon alang sa leksyon 6.

Mga Tubag sa Leksyon 6

Kon ang imong hustong tubag gikan sa 9 ngadto sa 10, gradohi ang imong papel ug labing maayo; 7 ngadto sa 8, butangi ug maayo; 6 kasarangan. Kon mokubos sa 6, balika pagbasa ang leksyon.

1. Filipos 2:3.
2. Sa wala pa maminyo, maghunahuna lamang siya sa iyang kaugalingon, human sa kamin-yoon duha na.
3. Ang bana ug asawa.
4. Pinaagi sa pagdagingot, dili magbagolbol ug himoon ang panimalay nga malipayon madanihon.
5. Gilimod niya ang pagtoo ug labaw pa siya kadautan sa dili magtotoo.
6. Nga ang ilang mga minyong anak hamtong na ug aduna nay katungod sa pagdumala sa ilang kaugalingon.
7. Ang Pulong sa Dios
8. Si Kristo ang Pangulo sa panimalay ug nagapuno niini sa Iyang gugma.
9. Pag-usik sa salapi, panagkabingkil, imoralidad, dautang mga basahon, malaw-ayng sinultihan, pangdiwata.
10. Pinaagi sa pagtalikod sa ilang daan nga paagi ug mosunod sa Ginoong Jesukristo.

Pila ang imong hustong tubag

Grado